

19/06/1999

Dr M terkilan Shahnnon maki ibu

KUALA LUMPUR, Jumaat - Datuk Seri Dr Mahathir Mohamad terkilan kerana Sasterawan Negara, Prof Datuk Shahnnon Ahmad, bukan saja menghina dengan kejian dan carutan, malah memaki ibu beliau dalam buku SHIT.

Menurut Perdana Menteri, beliau sendiri tidak tahu kenapa Shahnnon begitu marah dan benci terhadapnya, sedangkan beliau tidak pernah mengkritik penulis itu. Malah, beliau hanya menemui penulis itu sekali saja di Australia.

Dr Mahathir menjelaskan, beliau juga tidak menegur, mengkritik atau memarahi Shahnnon apabila menulis cerpen PIEM yang menghentamnya dan disiarkan dalam Dewan Sastera pada 1993.

"Tetapi Shahnnon tergamak memaki saya, mencarut sehingga kepada emak saya. Bangsa kita pantang ibu bapa dihina. Apakah Shahnnon sudah menjadi orang Barat yang tidak beradat, yang tidak dapat membuka mulut tanpa memaki dan mencarut?"

"Buku penulis Barat penuh dengan perkataan yang kita malu menyuarakan di hadapan khalayak ramai. Bagi orang yang menganggap liwat sebagai hak asasi, kegunaan perkataan itu di Barat memang sesuai."

"Tetapi apakah kita harus meniru mereka? Apakah Shahnnon memandang rendah budaya bangsa Melayu," katanya ketika menyampaikan ucapan dasar di Perhimpunan Agung Umno hari ini. Ini adalah kali pertama Dr Mahathir mengulas buku berkenaan.

Salinan sebahagian sedutan daripada buku SHIT, yang mengandungi istilah lucuh, memaki dan mencarut, turut diedarkan kepada perwakilan kerana Perdana Menteri tidak tergamak menyebutnya.

Selain itu, beliau meminta pejabat Setiausaha Agung Umno supaya membekalkan kepada perwakilan sedutan sebuah novel Inggeris The Hammer of Eden oleh Ken Follett yang mengandungi perkataan-perkataan lucuh.

Presiden Umno berkata, lebih malang lagi apabila Mursyidul Am Pas, Datuk Nik Abdul Aziz Nik Mat menghalalkan carutan Shahnnon terhadapnya dan emak beliau.

"Menghalalkan apa yang dikatakan Shahnnon samalah dengan mempersetujui dengan apa yang dikatakan oleh Shahnnon. Apakah pernah sesiapa mendengar saya mengeluarkan perkataan seumpama itu kepada Nik Aziz?"

"Apakah yang telah saya buat kepada Nik Aziz sehingga Mursyidul Pas ini sanggup mengizinkan perkataan mencarut yang terdapat dalam buku itu," katanya.

Beliau berkata, dalam usaha mempertahankan seorang ahli seumur hidup Pas, Nik Aziz tergamak menghina Tuhan dengan berkata Tuhan mencarut iaitu mengeluarkan kata-kata seperti digunakan oleh Shahnnon kepadanya.

Menurut Dr Mahathir, walaupun beliau sedar politik memang kotor tetapi beliau tidak menyangka ia boleh menjadi begitu kotor.

"Malah, kekotoran itu lebih kotor kerana ia datang daripada sebuah parti yang mengaitkan dirinya dengan agama Islam."

"Demikianlah, apabila sudah sanggup bekerjasama dengan syaitan maka awal-awal lagi syaitan sudah merasuk Pas dan pemimpin Pas sehingga sanggup bukan saja mencarut, menghina saya dan ibu saya tetapi juga menghina Tuhan," katanya.

(END)